

Kiŋwakti ki Jem Gia yə yi kə i Kiŋwakti ki Jem kələ mə

Kiŋwakti kələ nǐ nyaka Jem i bəni bə Nyə bəchi bə bə kə bə waŋ tsə tumi kichi. Kiŋwakti ki Jem kələ nyaki bəntəfi bəduli si mi wi Klistus kə i nōki i bəni kintəŋ. Gia yə mi wə wi nyaka kiŋwakti kələ num yeiŋ beiŋ bəh ŋga kə a mi wə wi kə wi Klistus fəki gia num yə yi chusiki a wi jiə shəm yi i Nyə.

Kifuu ki gia i Kiŋwakti kələ mə

1:1 Kin'yisi

1:2-8 I jiə shəm i Nyə bəh mfii biə bi dzəki i Nyə
wə

1:9-11 Kifuu bəh mbum

1:12-18 Kiməmsi bəh gia yə yi taŋki bəni

1:19-27 I wəkəki bəh i fəki

2:1-13 Kiə mi ki chusi kə chi chi

2:14-26 I jiə shəm i Nyə bəh kimfə ki chəŋ

3:1-18 Mi wi Klistus bəh ləm wi

4:1-5:6 Mi wi Klistus bəh mbi wələ

5:7-20 Bəntəfi chi chi

¹ Kiŋwakti kələ nyaka mih Jem, waiŋ wi nəm wi Nyə bəh Bah Jisəs Klistus. Mih nyaka i chwəŋbijun* biə jwəfi ntsə bəfa bə kə bəni bə Nyə bə bə waŋ tsə tumi kichi. Mih bəniki mbeiŋ.

I jiə shəm i Nyə bəh i fifiki

* **1:1** Chwəŋbijun bi bəni bə Nyə, bəni bədəkə kwakaki a, akə Bəju bə bə jiə shəm i Jisəs Klistus wə, a num bə bə bə gali ka nəki i bitumi bidəkə chi chi wə.

² Bwa bə nih bəŋ, jəbi wə biməmsi dzəki i mbein i dzəh dzəh wə, mbein dzô ka kidəŋ.

³ Mih dzakaki lə kəm mbein kiəki a si mbein tsəki təliki i bəməmsi kintəŋ, jiə a shəm i Nyə wə, yi ni fə mbein kiə i kaŋaki shəm bindzəŋ.

⁴ Mbein kâŋaki a shəm yiwə yaka i tsê kâasi, ka mbein ni numki bəni bə bə kə num bə ta kpein, chu dza kə fieŋ fidəkə.

⁵ Mi widəkə i mbein kintəŋ kabə dza mfi biə bi kə bi Nyə, wi nywâ num i Nyə ma Nyə ni nya. Nyə kə wə wi nyaki mi wichi bəh shəm yi yichi yəli kə mi.

⁶ Ayakalə, jəbi wə wi nywâki i Nyə wi nywaki bəh shəm yi yimu, mən̄ni kə. Mbein kiəki a mi wə wi mən̄niki wi kə aka bəwaa bə kinchwə kimbum kə fiəkə nən̄niki bə biəli di biə yi fiəkə tsəki.

⁷ Kiə wəmaka mi ma kwakaki a ŋgəin bi nywaki kwatiki lə fieŋ fidəkə i Bah.

⁸ Wəmaka mi kə wə wi kaŋaki shóm yifa wi jibli i gia yichi yə wi fəki.

Bəni bə kifuu bəh bə mbum

⁹ Mi wi bumni wi kifuu wəkəki ndzəŋni a Nyə kə wi dzasi wi i bein,

¹⁰ ayaka mi wi mbum wəkəki ndzəŋni a Nyə shishi wi i kuku, kəm wi bi nyə bee lə mbum bi a liŋ aka fluwa wə wi si bwusi i mfwan wə i chwa wi dza səkyi.

¹¹ Si wəŋ si buku yaka wi ka baiŋki wi shili mfwan kpiyi, bəfluwa bə yein səkyi, ndzəŋni biwə kaa, yi kə a liŋ ka mi wə wi nyaniki yəkəki nnyaki biəli mbum bi.

Mməmsi bəh gia yə yi taŋki bəni

12 Ndzɔŋni bimum kɔ bi mi wɛ wi kaŋa shɔm i jɔbi wɛ mmɔmsi dzɛ i wi, kɔm jɔbi wɛ wi gaka mɔmsi wiwɔ, wi bi kwati kifɔ a num nɔni kɛ ki bi tsɛ kaa kɛ, kɛ Nyɔ kaka i mi wichi wɛ wi kaŋki Nyɔ bɛh ki.

13 Jɔbi wɛ fiɛŋ taan̄ki mi a wi fɛ chu, wi ma dzɛkaki a taan̄ki Nyɔ ŋgain̄, kɔm fiɛŋ fidɔkɔ kɔkɛ i taan̄ Nyɔ a wi fɛ chu. Ayaka Nyɔ si taan̄ kɛ mi mfih.

14 Fiɛŋ fiɛ fi si taan̄ mi yakadain̄, akɔ biɛiŋ bichu biɛ wi kaŋaki kin̄kɔŋ yeiŋ, jɔbi wɛ bi lɛŋti wi bi kwa kaŋa wi,

15 ayaka jɔbi wɛ kin̄kɔŋ kiwɔ fiɛkɔ, ki dzɛ bɛh chu, jɔbi wɛ chu biwɔ kɔɔ kpɛiŋ, bi dzɛ bɛh kpi.

16 Bwa bɛ nih bɛŋ bɛ shɔm, kiɛ mbɛiŋ ma fwɔkyiki gwu yimbeŋ.

17 Gia yichi yɛ yi ndzɔŋki bɛh kinya kɛ ki ndzɔŋki tsɛ bwili fwu, yi nyɛki dzɛki num i beŋ i Nyɔ wɛ Tii Kimaa biɛiŋ bichi biɛ bi kɔ i beŋ nya baiŋni. Nyɔ si kwuni kɛ si kin̄jɔŋjɔŋ si kwuni di bi.

18 Akɔ wi wɛ wi n̄i sabibwili bukumbɛiŋ ka nya bukumbɛiŋ bɛh ja yɛ yi kɔŋkɔŋ yi nya nɔni kimfian̄ i bukumbɛiŋ, ka bukumbɛiŋ numki fiɛŋ fi ninshin̄ fiɛ wi n̄i sabibwili a, akɔ mfih i maa wi biɛiŋ bichi wɛ.

I wɛkɛki gia yi Nyɔ fɛ si yi nan̄ki

19 Bwa bɛ nih bɛŋ bɛ shɔm, mbɛiŋ kiɛ a mi wichi kaŋaki i kɔmsiki nyɛki ntuni bi i gia wɛ kɔmsi dzaka kɛ, kɔmsi bɔkɔsi kɛ shɔm,

20 kɔm mi wɛ wi si bɔkɔsi shɔm, si fɛ kɛ gia yi chɛŋ yɛ Nyɔ kaŋki.

21 Yi kɔ a, mbɛiŋ bɛɛ nɔni kinyɛŋ bɛh nɔni kilɛkɛli, mbɛiŋ shisiki gwu yimbeŋ, dzɔ gia yi Nyɔ

yə bə kə bə gbəli i shóm yimbəiŋ wə. Gia yələ kələ i gamti biŋ'waka bimbəiŋ.

²² Kiə mbəiŋ ma fwǎkyiki gwu yimbəiŋ i wəkəki a gia yi Nyǎ shəŋ. Mbəiŋ fǎki asi yi dzakaki.

²³ Na ndə wə wi kabə wəkəliki gia yi Nyǎ a wəkəlini fə kə si yi dzakaki, wi kə aka mi wə wi tseiŋki shi bi i mijwə wə,

²⁴ si wi tseiŋ yakadəiŋ, wi nyəkə jum yi akisəkə wi dali si wi tsəŋəki.

²⁵ Ayakalə, mi wə wi kəiŋsiki tseiŋki i nchi wə wi kaŋaki bəŋchi bəchi bwili bəni i mfa wə, wi num yeiŋ beiŋ jəbi wichi, dali kə gia yə wi wəkəki wi dzaka, fə asi yi dzakaki, Nyǎ bi faaŋ lə kimbəiŋsi i gia yichi yə wi fəki.

²⁶ Na ndə wə wi kabə bəəŋki gwu yi a ŋgaiŋ kə na mi wi bumni, kaŋa kə ləm wi, yaka wi fwǎkyiki gwu yi, gia yə wi bəəŋki gwu yi a ŋgaiŋ kə mi wi bumni kə kilələ.

²⁷ Bumni biə Nyǎ Tii wibukumbəiŋ kə wi bum a bi kə bindzəŋni chu num bi baiŋni i wi nshiŋ, kə bi mi wə wi təkniiki i bwa bəŋkwu bəh bəkaŋa bəŋkwu i bəŋgəkə bəbə wə. Ayaka chu num tə i wə wi təkniiki bəh gwu yi a biəiŋ bi fa kuku ma jisi wi.

2

Kiə mbəiŋ ki chūsiki chi chi

¹ Bwa bə nih bəŋ, si mbəiŋ jiə shəm i Bah wibukumbəiŋ Jisəs Klistus wə wi kə Bah wimbum, kiə mbəiŋ ki chūsiki chi chi.

² Mih dzakaki lə, kəm bəni bəfa ka dzə liə i juŋ yimbəiŋ yi ki juŋnini wə, num widəkə ləh bəmbuŋ bə ndzəŋni, ka ləkə finsəŋ fi kpə fi ləkəli, widəkə

wə num mi wi kifuu, num wi ləh bəmbuŋ bə shakayini.

³ Mbeinj ka nya mfi bimbeinj num i mi wə wi si lafi ndzəŋ gwu yi, ka dzaka i wi a “Dzê nûm fa.” Mbeinj dzaka i mi wi kifuu wə a “Nûm i beinj fi,” yudəkə a, “Tsê nûm shí i kuku i nshwainj wə.”

⁴ Mbeinj ka fə yakadəinj, ntə mbeinj fiəni chu lə bəni bə bə təinjiki bənsaka bəh shəm yichu a? Ntə yələ chusiki a mbeinj si chusi chi chi i mbeinj kintəəŋ a?

⁵ Bwa bə nih bəŋ bə shəm, mbeinj wəkəli, ntə akə bəni bə kifuu fa kuku bə Nyə kə wi sabibwili a bə kaŋaki kimum kə ki kə num ki jikə a? Ntə a chu kə a bə bə Nyə bi nya bə bəh di i ŋkuŋ bi bi beinj wə a num biə wi nŋ kaka i mi wichi wə wi kəŋki wi a?

⁶ Ayakalə, mbeinj si dza fimbeinj ŋgəmsi num ŋgəmsini mi wi kifuu. Bəni bə bə yaka num i mbeinj fuŋ guku tsə bəh mbeinj i juŋ yi bənsaka wə kə la bə ndə a? Ntə akə bəni bə kpə bələ a?

⁷ Ntə kə a bə bə bə dzakaki já yichu kəm yeli wi kəkni ni wə bə du i mbeinj wə a?

⁸ Mbeinj kēinjiki jīəki nchi wi ŋkuŋ Nyə asi wi kə i Kijwakti ki mə. Nchi wələ kə a, “Wə kəŋki mi wə wi kə kəmsi i wə wə asi wə kəŋki gwu ya.”

Mbeinj ka fəki yakadəinj, yaka mbeinj fəki gia yindzəŋni.

⁹ Ayakalə, mbeinj kabə chusiki chi chi, yaka kə chu si mbeinj fəki, yaka mbeinj bwiŋ nchi wə wi kwa mbeinj.

¹⁰ Mbeinj kiəki a, na ndə wə wi jiəki bənchi bə Nyə bəchi, ka bwiŋ wimu, yaka wi bwiŋ lə bə bəchi.

¹¹ Yi num yakadəinj, kəm Nyə wə wi nŋ dzaka a,

“Kiə nyum mi bəh kpə mi ma nê bəh mi widəkə”,
 a chu num tə wi wə wi nî dzaka a,
 “Kiə wə ki wêə kə mi”.

Wə kabə num maka wə nə bəh kpə mi nabə nyum
 mi, ayakalə num wə num wəə mi, yaka wə bwiŋ lə
 nchi wi Nyə.

¹² Ayakadəiŋ, mbeiŋ dzəkaki chu fê gia ka bəni bə
 Nyə bi saka bə biəli num nchi wə wi bwiliki bəni i
 mfa wə.

¹³ Mbeiŋ kîəki a jəbi wə Nyə bi sakaki nsaka, wi bi
 kwasi kə nshəiŋ i mi wə wi nî ka kwasi dəkə nshəiŋ i
 widəkə. Ayakalə, mi wə wi kwasiki nshəiŋ i widəkə
 bi bəiŋ lə i nsaka wə.

Gia yə yi chusiki a mi jiə shəm i Nyə, akə kimfə ki

¹⁴ Bwa bə nih bəŋ, mi ka dza dzaka a ŋgaiŋ jiə
 shəm i Nyə, kimfə kiwə chusi kə yakadəiŋ, yəmaka
 ni gamti wi i nə wə a? Shəm yə wi jiə kələ i bwili wi
 a?

¹⁵ Bə dzə a, waiŋnah wi nyukuni yudəkə jəmi ya
 kabə dzaa bəmbuŋ bəh dzeiŋ biə wi kə i dzi i chəkə,

¹⁶ wi dzə i wə, wə dzaka i wi a, “Ma Nyə bəiŋsi wə
 i kwati bəmbuŋ bəh dzeiŋ.” Wə ka dzaka yakadəiŋ,
 maka wə nya wi bəh biəiŋ biə wi nəŋki, yəmaka ni
 gamti wi bəh nə a?

¹⁷ Mbeiŋ ka yeiŋ dəkə a, mi kabə dzaka a ŋgaiŋ
 jiə shəm i Nyə, kimfə kiwə chusi kə yakadəiŋ, yaka
 shəm yə wi jiə a yiyi kə a kiŋkpili ki fiəŋ a?

¹⁸ Mi widəkə kələ i dza dzaka a, mi widəkə kə n'yi
 num a i jiə shəm i Nyə, ayaka widəkə kaŋa num
 kimfə kindzəŋni. Mih ka ni dzaka n'yiŋ a, chūsi
 mih si mi kə i jiə shəm i Nyə kimfə kindzəŋni kəbi,
 ma mih ka ni chūsi i wə njiə wuŋ wi shəm i Nyə
 num i kimfə kindzəŋni wə.

19 Mi ka bum a Nyɔ kɔ wimu, yaka akɔ ŋkɔŋ. Ayakalɛ, na bɛchinda bɛ ŋkpɛli bumki lɛ yaka tɛ nyummyi bɛh nlwa.

20 Wɛmaka mi kɔ kiyun. Wi nɛŋki a mih chɔsi a, mi ka jiɛ shɔm i Nyɔ kimfɛ kindzɛŋni kɔbi, yaka yɛmaka kɔ a kilɔlɔ a?

21 Ntɛ gia yɛ yi nɛ fɛ a Nyɔ yɛiŋ Ablaham tii wibukumbɛiŋ a wi kpɛiŋ i mi wi, a nɛ kɔ kɔm kimfɛ ki ki chɛŋ a? Wi nɛ dzɔ waiŋ wi Ayjik nɔsi i tɔŋ wi mfɛ gia wɛ i fɛ gia yɛiŋ i Nyɔ.

22 Mbɛiŋ yɛiŋ a shɔm yɛ wi nɛ jiɛ i Nyɔ bɛh kimfɛ ki ki chɛŋ nɛ nyaniki gvu wimu a? Kimfɛ ki ki chɛŋ nɛ chusiki a shɔm yɛ wi nɛ jiɛ i Nyɔ nɛ kɔ yi jikɛ.

23 Ayaka yi ka dzɔ kpɛiŋ asi bɛ nɛ nyaka i Kiŋwakti ki Nyɔ mɛ a,

“Ablaham nɛ jiɛ shɔm i Nyɔ,

kɔm yaka, Nyɔ ka yɛiŋ a wi kɔ mi wi chɛŋ.”

Bɛ ka bɔɔŋki wi a nɛiŋ Nyɔ.

24 Mbɛiŋ chu yɛiŋ a fiɛŋ fiɛ fi fɛki a Nyɔ yɛiŋ a mi kɔ wi kpɛiŋ i mi wi kɔ kɔm kimfɛ ki ki chɛŋ, a kɔbi a shɔm yɛ wi jiɛ i Nyɔ wɛ shɛŋ a?

25 Yi kɔ a liŋ si yi Lahab miŋkpaŋa wi tɔkɔlini wɛ nɛ kɔ. Gia yɛ yi nɛ fɛ a Nyɔ yɛiŋ a wi kpɛiŋ i mi wi a nɛ kɔ kɔm kimfɛ ki ki chɛŋ. Wi nɛ dzɔ bɛni bɛ bɔ nɛ kɔ dzɔkɛh wi Islae i wi dzu, ka bi chusi dzɛh yidɔkɔ chi chi i bɔ, i nyam tsɛ yɛiŋ.

26 Yi kɔ a liŋ asi kiŋ'waka ka bee nchaŋa ki gwu ma gwu yiwɔ numki kiŋkpili ki fiɛŋ, yi num a liŋ tɛ asi mi wɛ wi jiɛ shɔm i Nyɔ na fɛki kimfɛ ki ki chɛŋ yaka yɛmaka kɔ a kiŋkpili ki fiɛŋ.

3

Mi tǎkniki bǎh lǎm wi

¹ Bwa bǎ nih bǎŋ, kiǎ mbǎiŋ bǎduli ma nǎŋki i nǔmki bǎni bǎ lanini. Ntǎ mbǎiŋ kiǎki lǎ bindzǎŋ a bǎni bǎ bǎ laniki, nsaka wibǎ bi numki wi gumini a?

² Bukumbǎiŋ bǎchi gbǎyiki lǎ i dzǎh yiduli wǎ. Ayakalǎ, mi kabǎ num maka wi gbǎ i ndzaka wi wǎ, yaka wi kǎ mi wi ndzǎŋ tsǎ bwili fwu, chu kiǎ tǎ i tǎkni bǎh gwu yi yichi.

³ Bukumbǎiŋ si dzǎ nsǎŋ lǎkǎ i dzaka ki kikum wǎ i fǎ a ki wǎkǎki i bukumbǎiŋ. Ayaka bukumbǎiŋ ka lumsiki nyam yiwǎ yi tsǎ i di biǎ bukumbǎiŋ nǎŋki.

⁴ Mbǎiŋ yeiŋ tǎ si bǎŋgwuki bǎmbum kǎ i bǎkǎ. Bǎ num bǎmbum bǎmbum, ayaka fiǎkǎ yi lǎkǎki shi chini. Ayakalǎ, fiŋ fiǎ mi wi gukuni wi ŋgwuki fǎki a ŋgwuki wiwǎ tsǎki i di biǎ wi nǎŋki, fi kǎ a finchiŋ.

⁵ Yi kǎ a liŋ si lǎm kǎ. Wi kǎ na fiŋ fi nchiŋ i mi mǎ. Ayakalǎ, wi si shi dzaka a gia yi ghanjini yi gwu.

Ntǎ mbǎiŋ kiǎki lǎ si gbuku winchiŋ kǎ i bumi kwa shisi kǎbǎi kimbum i kuku a?

⁶ Lǎm kǎ tǎ aka gbuku. Lǎm kǎ kimbu i gwu yi mi wǎ i kintǎŋ ki bimbu biwǎ bichi biǎ wǎ biŋiŋ bichu bichi i fa mbi wǎlǎ wǎ kǎ num bi juŋni yeiŋ bǎiŋ ka wanji tsǎki, bǎkǎli gwu yi mi wiwǎ yichi. Lǎm wiwǎ si kpa gbuku wi bǎkǎli nǎni ki mi kichi. Ayaka gbuku wǎlǎ kǎ num lǎm si dzǎ wi i gbuku wimbum wǎ.

⁷ Bǎni kǎlǎ i lani ŋkaiŋni wi nyǎm yichi yi wǎkǎ i bǎ. Bǎ kǎ bǎ lani lǎ nyǎm yi chwa bǎh minyǎni bǎh nyǎm yǎ yi seiŋki bǎh tǎ bǎh yi bǎkǎ.

⁸ Ayakalə, mi widəkə kəkə wə wi kə i lani bəh ləm. Ləm si waka kə i dzakaki gia yichu wi si num wi jikə bəh chu a num biə bi kə i wəw mi ka kiləfi.

⁹ Akə ləm wələ wə bukumbəiŋ si kəkəsi Ba Tii wibukumbəiŋ yeiŋ, a chu num a wi wə bukumbəiŋ si nya ləiŋ yeiŋ i bəni, bəni bələ num a maa Nyə bə bə bwəsi wi.

¹⁰ I dzaka kələ wə kimu bukuki kiŋkəkəsi chu buku ləiŋ. Bwa bə nih bəŋ, yələ kəkə i numki yakadəiŋ.

¹¹ Yaka mwi mi baiŋni bəh mi jili kələ i bukuki i dzaka kimu wə a?

¹² Bwa bə nih bəŋ, kpəiŋ wi fimbi kələ wum mitam mi kpəiŋ wi njiəŋ a? Ma kpəiŋ wi bimfəŋ kələ wum fimbi a? Yi bəŋ num a dzəŋə yi mwi mi jili kəkə i bwiliki tə mwi mi baiŋni.

Mfi biə bi buku i beiŋ

¹³ Akə ndə i mbəiŋ kintəŋ wə wi dzakaki a ŋgaiŋ fifiki lə chu num ŋkiə gia? Wəmaka mi chusi la gwu yi i nəni ki kindzəŋni wə bəh kimfə ki ki chəŋ kə wi fəki ghaŋsi kə gwu, ka mi wə wi fifiki si num.

¹⁴ Ayakalə, mi kabə feyiki bəh kiŋghəkə bəh dzəkəh yi bukuni i shəm yi mə, kiə wi ki ghaŋsi kə gwu a ŋgaiŋ fifiki lə. Wi ka fə yakadəiŋ, yaka wi nəiŋki lə gia yi ŋkəŋ.

¹⁵ Biəmaka ŋkaiŋni mfi kəkə bi beiŋ. Akə bi fa kuku, a num bi mi wiwəm, a num bi ŋkpəli.

¹⁶ Mbəiŋ kiəki a na faiŋ bəni kaŋaki kiŋghəkə bəh dzəkəh yi bukuni, gia si nyani kə feiŋ i dzəh yindzəŋni wə. Bə ni fəki ŋkaiŋni yi gia yichu yichi feiŋ.

¹⁷ Ayakalə, mi wə wi kaŋaki mfi biə bi dzəki i bein si kaŋaki lə i yisi baiŋki kaŋa kimbəinŋni, chu bəni, nya tə kituni i mi widəkə, num wi jikə bəh nshəin bəh kimfə kindzəŋni, chu chusi kə chi chi, chu kaŋa kə já yifa.

¹⁸ Ayakadəin, bəni bə bə jiəki kimbəinŋni bə si gbəli ŋgəkə a num kimbəinŋni kəh num nəni ki chəŋ.

4

Bukumbəin ma kwā nsein bəh biəin bi mbi

¹ Gia yə yi si dza dzə bəh jum bəh njwə i mbein kintəəŋ kə nə? A kəkə kiŋkəŋ ki biəin biə gwu yimbəin nəŋki bi jumki i shəm yimbəin wə a?

² Jəbi wə mbein nəŋki fiəŋ mbein na kwati, ayakadəin mbein ka nəŋki i wəə mi ka mbein kwati. Jəbi wə mbein bukuki dzəkəh i biəin wə, ayaka mbein kəbi i kwati, mbein ka yəliki mbein jwə. Gia yə yi fəki ka mbein ma kwati kə kəm mbein si nywa kə i Nyə.

³ Na jəbi wə mbein si bikə mbein si kwati kə num si mbein bikəki bəh biŋkwaka bi kpreinŋni kə. Mbein nywaki biəin num i fə gia yə gwu yimbəin nəŋki bəh bi.

⁴ Mbein lansi kə aka bəkaŋa bəh bənyuku bə bə lə bee bəkaŋa bəbə bəh bənyuku bəbə ka fəki num nəni ki təkəlini. Mbein kiəki kə a mi wə wi kwa nsein bəh mbi wələ, wi kə lə mbaiŋŋni wi Nyə a? Ayakadəin, mbein kiəki a kəŋ a numki na ndə wi saiŋbwili i kwa nsein bəh mbi wələ, wəməka chu mbaiŋŋni wi Nyə.

⁵ Yi kə a mbein nyani dəin i kwakaki a gia yə bə nŋ nyaka i Kiŋwakti ki Nyə wə kə kilələ a? Bə nŋ kə bə

nyaka a, “Nyɔ kanaki kinƙɔŋ, dɛ bɛh ŋga i kin'waka kɛ wi nɪ jiɛ a ki numki i bukumbɛiŋ wɛ.”*

⁶ Nyɔ gamtiki lɛ bukumbɛiŋ nalɛ. Akɔ gia yɛ bɛ nyaka i Kinwakti ki Nyɔ wɛ a,

“Nyɔ shisi bɛni bɛ bɔ ghanɔsiki gwu yibɔ, ayakalɛ wi duksi bɛni bɛ bɔ shisiki gwu yibɔ.”

⁷ Ayakadɛiŋ, mɛiŋ nyâ gwu yimɛiŋ i Nyɔ, mɛiŋ bwân ŋga bɛh wi ni gɛiŋ i mɛiŋ chɛiŋ.

⁸ Mɛiŋ dzê kɔmsi i Nyɔ wɛ, ayaka wi ni dzɛ kɔmsi tɛ i mɛiŋ wɛ. Mɛiŋ bɛni bɛchu, mɛiŋ bwîli kan i gia yichu wɛ, mɛiŋ wâkɔ shóm yimɛiŋ, mɛiŋ bɛ mɛiŋ kanaki biŋkwaka bifa bɛh Nyɔ.

⁹ Mɛiŋ nûm bɛh nsheiŋ, mɛiŋ dâki shîsi mindɛm lɛ wɔkwɔkwɔk. Mɛiŋ bɛe kisununi, mɛiŋ dâki num dɛni, mɛiŋ bɛe ndzɔŋni biɛ mɛiŋ wɔkɔki, mɛiŋ chûŋsi kifwu kimɛiŋ.

¹⁰ Mɛiŋ shîsi gwú yimɛiŋ i Nyɔ nshiŋ, ayaka wi ni dzasi mɛiŋ i ɛiŋ.

Kiɛ mi ki sâka kɛ kimfɛ ki waiŋnih wi

¹¹ Bwa bɛ nih bɛŋ, kiɛ mi ma dzâkaki já yichu kɔm waiŋnih wi. Mi kabɛ dzakaki ja yichu kɔm waiŋnih wi nabɛ i sakaki kimfɛ ki waiŋnih wi, ma yi numki a wi dzakaki ja yichu num kɔm nchi wi Nyɔ chu saka nchi wiwɔ. Mi kabɛ sakaki nchi wi Nyɔ, ma yi numki a wi kɔ mi wɛ wi chu jiɛki kɛ nchi. Mi wiwɔ fiɛni chu lɛ mi wɛ wi sakaki nchi sakani.†

* **4:5** Nabɛ a “Kin'waka ki Baiŋni kɛ Nyɔ nɪ nya i bukumbɛiŋ, ki kanja kinƙɔŋ, ki lansi dɛki a bukumbɛiŋ nûm ndzɔŋ bɛh Nyɔ.” † **4:11** Nchi wɛlɛ kɔlɛ i numki wɛ wi dzakaki a, “Wɔ kɔŋki mi wɛ wi kɔ kɔmsi i wɔ wɛ asi wɔ kɔŋki gwu ya.”

¹² Mi wə wi nyaki nchi chu tainyi bənsaka bə bəni akə shəŋ mi wimu. Akə a wi wə wi kə i bwili nabə i kaasi mi. Wə kə ndə wə wə sakaki mi widəkə a?

Kiə mbein ma chəkəki kijum

¹³ Mbein wəkə, mbein bə mbein dzəki mbein ka dzakaki a, “Dain nabə kijiəli buku ni buku tsə lə i kwili wələ wə nabə kə yaka wə, buku nə fein jia, i fəki shi i kwati mbee.”

¹⁴ Mbein si dzaka yaka kiə gia yə yi kə i buku num kijiəli a? Mbein kiəki alə fiəŋ fiə nəni kimbein kə fi a? Nəni kimbein kə ka bikwu biə bə yeinŋki, bi mətɪ a twesi fiəni samni.

¹⁵ Gia yə mbein kə i dzakaki kə a, “Bah ka bum a buku numki bəwəm, buku ni fə yələ nabə yə yaka.”

¹⁶ Ayakalə, mbein dzəki mbein ka ghanŋsi lə gwu, chəkə kijum. Mbein kiə a kəmaka kinghanŋsi ki gwu kə chu.

¹⁷ Ayakadəin, mi kabə kiəki gia yindzəŋni yə wi kanŋaki i fə, wi fə kə, yi numki a wi fə chu.

5

Bəni bə mbum təkni

¹ Bəni bə mbum, mbein wəkə gia yə mih dzakaki. Mbein dəkɪ, wili kəm ŋgəkə wə wi dzəki i mbein wə.

² Mbum bimbein kə bi fə lə, shəkə num yi menɪ bəmbuŋ bəmbəin.

³ Biəin bimbein bi kpə kə num bi chami lə. Nchami wiwə ni numki kinchəsi i nəni kimbein wə, wi num i dzi tə nyam yimbein yi gwu aka gbuku. Biələ si num chəkə bi gəksini mbein juŋni jiə a mbum.

⁴ Mbein yəin, mbein fwəkyi bəni bə bə nəmki i mbein khə. Bə kəh biəin bi mbein, mbein nəin i gəm

bə, bə ka dəki. Bə də lə Bah Nyə wə wi kaŋaki Nga Bichi wəkə ndə wibə.

⁵ Mbeinj nəki fa mbi wə dzi kidəəŋ kimbəinj asi gwu yimbəinj kəŋki. Mbeinj dzi ka kpali ka numki aka nyám yi bwilini, yi wəkəli jəbi wə bə bi təinjyi yi yeinj.

⁶ Mbeinj bwanj gvu i bəni cheinj bə liə i ŋgəkə wə. Mbeinj wəəyi bəni bə bə ka fə dəkə gia yidəkə, a chu num bəni bə kəbi i bwanj ŋa bəh mbeinj.

Bəni bə Nyə nŭmki bəh ŋkaŋa wi shəm

⁷ Bwa bə nih bəŋ, yi kə a mbeinj nŭmki bəh ŋkaŋa wi shəm i tsə búku jəbi wə Bah bi fiəniki dzəki yeinj. Mbeinj yéinj si bəni bə bə nəmki khə si kaŋa shəm i tsə buku jəbi wə bə si kəh biəinj bindzəŋni i khə wibə wə. Bə si wəkəli dzaŋ dzə ka bə gbəli biəinj, bə wəkəli bi kpeinj i ŋkəh wə.

⁸ Mbeinj tə kəŋaki shəm ayakadəinj. Mbeinj nŭmki bəh ŋga kəm jəbi wi Bah si num kəmsi dzə.

⁹ Bwa bə nih bəŋ, kiə mi ma shwíŋyiki waiŋnih wi. Mi wə wi shwíŋyiki waiŋnih wi bi kaŋaki lə nsaka. Mi wə wi bi təinjki bənsaka wi si num lə i dzaka kiflənə wə.

¹⁰ Bwa bə nih bəŋ, mbeinj síni dzə i bəni bə ntum bə Nyə bə bə si dzaka i bəni i yeli wi Bah wə. Bə ni yeinjki lə bəŋgəkə, ka kaŋaki a shəm wəkəli.

¹¹ Bukumbəinj yeinj a bəni bəchi bə bə ni kə bə kaŋa shəm tsə kaasi, kə num Bah nŭ lə kimbəinj si bə wə. Mbeinj kə mbeinj wəkə lə kəm Jəb si wi nŭ kaŋa shəm i tsə kaasi, chu wəkə tə si Bah nŭ tsə beəŋsi ŋgəkə wi, wi fiəni chu bindzəŋ. Bah nŭ fə yakadəinj, kəm wi si cham lə i bəni, kwasi nsheinj i bə.

12 Bwa bə nih bəŋ, gia yə yi tsəki gia yichi kə a, mi ka dzaka gia kiə wi ki kainj kə. Kəŋ wi kainjki num i bəəli, nabə a wi kainj i nshwainj, nabə i yeli winainj fiəŋ. Mi ka bum gia a, “Aaŋ”, yi ka numki asi yi kə. Wi ka nəiŋ a, “Aayi”, yi ka numki asi yi kə. Mbəiŋ fəki yaka, ka Nyə bi ma chu jiə mi i ŋgəkə wə.

Ntsa bəh njia shəm gamtiki lə

13 Mi widəkə i mbəiŋ wə kabə yeiŋ ŋgəkə, wi ka tsəki. Mi ka wəkəki ndzəŋni, wi ka yəəŋki kəksi Nyə.

14 Mi widəkə i mbəiŋ wə kabə gwəiŋki, wi bəəŋ bətiijijunni ki bəni bə bumni, bə dzə tsə i wi bəiŋ, fiəŋsi wi bəh miə i yeli wi Bah wə,

15 ntsa wiwə wə bə tsa lə num bə jiə shəm i Bah wə, ni gamti mi wiwə wi ni bənih, Nyə ni dzasi wi i bəiŋ. A kabə num a mi wiwə fə chu, Nyə ni dalinya wi.

16 Ayakadəiŋ, yi kə a, mi ka fə gia yichu, wi fūku i waiŋnih, bə wi tsə i gwú yibə, ka Nyə ni chuku mbəiŋ. Ntsa wi mi wi chəŋ kaŋaki lə ŋga nalə fə gia yiduli.

17 Mbəiŋ sɪni dzə gia i Elaja wə. Wi nɪ kə mi wiwəm ka bukumbəiŋ. Wi nɪ tsa jiə ŋga a dzaŋ ma dzə i fa kuku. Dzaŋ baan i bəiŋ yakadəiŋ i jia yitali wə bəh kinjka.

18 Wi bi fiəni tsa, Nyə faan shi dzaŋ, biəiŋ fiəni kə i nshwainj wə.

19 Bwa bə nih bəŋ, mi widəkə i mbəiŋ ka bee dzəh yi ŋkəŋ ka njəŋki, mi widəkə fiəni dzə bəh wi i jum wə,

20 mi wə wi dzə bəh wi i jum wə wi kɪə a mi ka fiəni mi wə wi fəki gia yichu, wi bəe dzəh yi yi kilələ,

yaka wi bwili wəmaka i kaŋ yi kpi wə, Nyɔ dalinya
chu bi biduli.

**Kinwakti ki Nyɔ Minƙaiŋ Mifian
Chungmboko: Kinwakti ki Nyɔ Minƙaiŋ Mifian (New
Testament+) for Cameroon**

copyright © 2021 Wycliffe Bible Translators, Inc.

Language: Chung (Cung)

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 22 Dec 2025 from source files dated 1 May 2025

ff8b447d-0e78-5782-840d-48c27035a093